

Jacan'cho

Números

Pa'cco Chiga manda'choma pañamba israendecuja Chiga tise'panga afeya'cho andenga jaye ashaen'fa. Tsa'ma ccase pañambipa egae tsinconsi Chigaja se'pi tsanga ca'niñe. Tsa'cansi cuarenta canqqe'fave a'i menia'ye jacamba can'jen'fa poi'yi'cco tsesu in'jambi'choandeccu paya'ngae.

Levítandeccu tsoña'cho

3 ⁵Na'su Chigama Moisésma su:
⁶“Leví aindecuma ttu'seja cuintsu tsendeccu Chigama afa'su Aarónma shondosundeccuve dapa tisema fuite'faye. ⁷Nane poi israendeccu semaña'chonga tsu jo'su levítandeccu'yi ca'nimba Aarónma pañamba tise mandaquua'caen Chigai'ccu cachuicco'je'tti'su sema'bama sema'faya. ⁸Toya'caen tsu Chigambe osha'cho tse'ttini jincho'choma'qqe coira'jepa poi israendeccu fuitesundeccu'faya. ⁹Nane poi israendeccu'su'ye levítandeccu'yi attufaenjan cuintsu Aarón, tise dutssiyendeccu tise'pama manda'faye. ¹⁰Toya'caen antte'faja cuintsu Aarón, tise dutssiyendeccu'yi Chigama afasundeccuve da'faye. Faesu injanga tsa semabanga ca'ni'ninda tsu fi'ttiya'cho.”

Israendeccu Sinaíne sombo'fa'cho

10 ¹¹Segundo canqqe'fa'ye, segundo ccovu, toya'caen a'ta veinte, tsa Chigai'ccu cachuicco'je'tti'su carpa ombani can'jen'cho unjimbaja jangi. ¹²Jangisi israendecuja ñoñamba Sinaí a'i menia'ñe sombopa ja'fa. Unjimbaja Parán a'i menia japa ccutsu. ¹⁷Nane ñoñamba Chigai'ccu cachuicco'je'tti'su carpama andiansi tsama angaye mandaye'chondeccu, tsa Gersón dutssiyendeccu, toya'caen Merari dutssiyendeccu tsama opipa anga'fa. ³³Tsa'caen Na'su Chiga ccotta'cco'ye sombopa poi israendeccu tres a'tave fae'ngae tsuipa jayi'fa. Jayi'fasi Na'su Chiga a'i'ccu injancco'fa'cho cafonjan tise'pama o'tie ja tise'pa mani ño'faya'chove tta'ttaye. ³⁴Toya'caen poi a'ta tise'pa jaye sombo'fa'ninda tsu Na'su Chiga unjimbaja tise'pambe omba'ye jayi.

Na'su Chiga aña'choma afeye su'cho

11 ¹Fae a'ta israendecuja Na'su Chigama afaseye ashaen'fa tisupa ma'caen can'jen'chone. Tsa'caen afase'fa'choma pañamba Na'su Chigaja iyicca'yepa si'ngema moesi pa'cco tise'pa can'jen'cho utufa'ye setsa. ²Tsa'caen setsasi aindecuja Moisésma ñajan'fa cuintu fuiteye. Tsonsi Moisésja Na'su Chigama ñajan tsendeccune. Ñajansi si'ngeja pa. ³Tsa'cansi tse'ttima Tabera qqen inisian'fa. Nane tse'ttinga tsu Na'sumbe si'ngeja tise'pama iyicca'yepa setsa.

⁴Toya'caen israendecui'ccu fae'ngae jacan'cho injanga cansesundeccu jo'su aña'choveyi añe injan'jen'fa. Faesu israendecuma in'jaensi poiyl'cco i'nañe ashaemba su'fa: “¡Aña'cho te jiñe'can cuintu ingi an'jeñe! ⁵Nane injan'jen gi ingi Egiptoni can'jemba acquiatsse asipa avuma an'jen'choma. Toya'caen gi tzeni an'jen'fa pepino, melón, sevoya, totoa sevoya, toya'caen ajoma. ⁶Tsa'ma ja'ñonda gi qquipoe'supa pa'faya. Vanija jo'su manámeñi gi an'jen'fa.”

⁷(Nane manánda tsu culantro choa'caen chipiri cho'ccopa tumbaquia'caen quiopacho'cco. ⁸Toya'caen ancan'ninda tsu harinama yayapai'ccu panme matssanquian'caen in'jaen. Nane aindecuja japa tsesuma taipa sun'dapa vuvutssia've tsomba panme matssan'fa. ⁹Poi cose suruno sheque'nijan maná'qqe canquenga sheque'je.)

¹⁰Israendeccu, tise tsa'osundeccu'qqe tsa'caen tise'pa carpa'ye ina'jen'fa'choma Moisésja paña. Na'su Chiga'qqe pañamba iyicca'yeni in'jamba Moisés tsendeccuma chi'gapa ¹¹Na'su Chiganga qqen su:
—¿Jongoesie qui ñajan que shondo'suma qqen egae tson? ¿Ma'caen in'jamba qui ña va aindecuma angacaña'chove manda? ¹²Que ñama ñajan va aindecuma angaye, que ingi tayopi'su coenzandecunga afeye su'cho andeni. Tsa'ma ¿ñanda ti gi tise'pa yaya, tsambi'ta mama, tise'pama du'shu toya chocho'je'choma'caen tivenga opipa angaye? ¹³¿Manima gi aña'chove somboemba poiyl'cco tise'pama o'fiaña? Nane i'ná jipa tsu 'Aña'chove ñanga afeja' qqen ñama su'fa. ¹⁴Ñajan tisuyi poiyl'cco va aindecuma angacañe oshambi gi. Nane andu'cho panshaen tssaitssiqquiacan'fa tsu va aindecuja ñane. ¹⁵Nane ñoa'me ñame in'jan'cho'ta panshaen tsa'caen ñama tsinconsa'ne junde ñama fi'ttija. Tsa'caen da'ta gi ti'tsse ña vana'jen'choma vanaña'bi.

¹⁶Tsama pañamba Na'su Chigaja su:

—Setenta israelsu coenzandecuma ñambe boñajan majama que poiyl'cco israendecuma mandal'jeja'chone in'jan'chondeccu'suma. Tsendeccuma ipa ñai'ccu cachuicco'je'ti'su carpani tise'pai'ccu ronda'jeja. ¹⁷Tzeni gi andepa que'l'ccu condasepa quenga afe'cho Qquendya'pama enttingeve isupa tsendecunga afeya cuintu quema fuitepa aindecuma angacan'faye. Tsa'caen tson'nijan fae'ccoya'bi qui. ¹⁸Toya'caen aindecuma mandaja cuintu tu'ine tisupama ñoña'faye ñanga ccutsu'faya'chove. Ñoñamba tsu añachoma an'faya. Tayo gi paña tise'pa i'namba qqen su'je'choma: “¡Aña'cho te jiñe'can cuintu ingi an'jeñe! ¡Egiptoninda gi ti'tsse

ñotsse canse'fa' Nane ñotssi tsu ña tise'panga afesi cuintsu añachoma an'faye. ¹⁹Ni fae a'ta, ni dos a'ta, ni cinco, ni diez, ni veinte a'tane'ñi afeya'bi gi. ²⁰Tsa'ma fae ccovu pa'ccone gi afeya cuintsu tsofátuni so'mbottsse amba chi'gatsse an'faye. Nane ña tise'pai'ccu can'jen'ni'qqe tsu ñama chi'gapa cati'fa. Ñama catipa tsu ña pañaj'en'ni i'namba su'fa: '¿Jongoesie gi Egiptone sombo'fa?'

²¹Tsa'caen susi Moisésja su:

—Ñai'ccu jacansundeccuta tsu seisciento mil tsandie. ¿Tsa'cantssia'ma ma'caen qui fae ccovu pa'ccone añachoma afeya? ²²¿Mani tsu tsain'bitssi oveja toya'caen vaura'qqe jiña tsama fi'ttipa tsa pa'tssi a'inga afeye'ta? Mapán mar'su avuma pa'ccoma afe'ni'qqe nepiya'bi tsu poi'yi'cconga.

²³Tsa'caen susi Na'su Chigaja su:

—¿In'jan ti qui tsata tsu re'ricco ñane'jan? Ja'ño qui atteya ña suquua'caen ña ñoa'me tson'choma.

Setenta israe'su coenzandeccu Chiga Aya'fama afa'cho

²⁴Moisés carpane sombopa japa aindecungu conda Na'su Chiga tisenga su'choma. Toya'caen setenta israe'su coenzandeccoma boñamba tise cachuicco'je'cho carpanga shoquendi'e ccutsian. ²⁵Tsa'caen tsonsi Na'su Chigaja unjimba'ccoi'ccu andepa Moisésnga afa. Afa nanimba Moisés an'bian'cho Qquendya'pama enttingeve isupa tsa setenta israe'su coenzandecungu afe. Tsa'caen Chiga Qquendya'pa tise'panga ca'nisi Chiga Aya'fama afa'fa. Tsa'ma ti'tsse tsa'caen afa'je'fambi.

²⁶Toya'caen dos tsandie, Eldad, Medad'qqe tsa setentave ttu'secho'su tsa carpani jambi'ma toe canqueni can'jen'fa. Tsa'caen can'jen'fa'ni'qqe Chiga Qquendya'paja tise'panga'qqe ca'nisi canquene Chiga Aya'fama afaye ashaen'fa. ²⁷Tsa'caen afa'je'fasi fae du'shu Moisésni conda'su buttopa jipa qqen su:

—Eldad toya'caen Medad tsu canqueni Chiga Aya'fama afa'je'fa.

²⁸Tsonsi Josué, tsa Nun dutssi'ye, dusuite'yi Moisésma fuite'suja qqen su:

—¿Ña na'su, Moisés, tsendecumajan se'pija!

²⁹Tsa'ma Moisésja qqen su:

—¿Ñameñi injan'jemba ti qui se'pi? Isha tsu Na'su Chigaja tise Qquendya'pama poi'yi'cconga afeya cuintsu Chiga aya'fama afa'je'faye.

³⁰Tsa'caen tson nanimba Moisés toya'caen poi'yi'cco israe'su coenzandeccu'qqe canqueni ji'fa.

Na'su Chiga chivi'rima moe'cho

³¹Na'su Chiga cuintsu mar'ye fingiañe mandasi tsa fingianjan tsain'bitssi yayapa chivi'rive i. Tsa'caen isi tsesuja israendeccu canquenga amppipa toya'caen canque utufanga'qqe amppi'fa. Nane fae a'ta cose'tsse ja'ni'qqe toya tsu tsesuja tseni sheque. Toya'caen tisupanaccumbe ombanga amppi'jesi ñoa'me fae metro tombusu'qquiaca'on tsu. ³²Tsequi a'ta pa'cco

cose'qqe toya'caen ccaqui a'ta'qqe aindeccuja toya tsesuma tai'je'fa. Poiyi'ccoma bove'cooe indiquia'can'qqe tsu yayapa chivi'ri diez boñame tai. Tsa'caen taipa tsu canqqe utufanga san'jan'fa. ³³Tsa'caen taipa tise'pa tsesuma an'jen'ni Na'su Chigaja tise'pama ñoa'me iyicca'yepa tise'pa injama'choma somboensi tsain'bitssi a'i tsequi pa'fa. ³⁴Tsa'caen ña'choveyi ñe injan'jendeccu pasi a'tupa tsu tse'ttima Kibrot-hataava qqen inisian'fa.

³⁵Tsa Kibrot-hataavane sombopa israendeccuja Hazerotni nepipa tse'tti can'jen'fa.

Moisésma egae afase'fa'cho

12 ¹María toya'caen Aarón Moisésma egae afaseye ashaen'fa. Nane Moisés Cus ande'su pushesuma pushesi tsa'caen afase'fa. ²Toya'caen tsu su'fa: “Na'su Chigaja jo'su Moisés'i'ccuyi afa'jembipa ingi'ccu'qqe afa'je.” Tsa'caen su'fa'choma Na'su Chigaja paña.

³Ñoa'metsseta tsu Moisésja poi andesundeccuma bove'cco qqen injancho. ⁴Tsa'cansi tsu Na'su Chigaja Moisés, Aarón toya'caen Maríama su: “Que'i dosyi ñama cachuicco'je'cho carpani ja'faja.”

Tsa'caen susi tsu ja'fa. ⁵Tise'pa jasi Na'su Chigaja sintssia unjimba'cco'ccu andepa carpanga cani'jen'ttinga ccutsu. Andepa Na'su Chigaja Aarón toya'caen Maríama ttu'sesi tise'pa jisi ⁶qqen su: “Va ña que'inga su'choma paña'faja: Minga'ni Chiga Aya'fama afa'su que'iccu can'jeni ñajan attian'choi'ccu toya'caen ayo'oni tise'ma afa'je. ⁷Tsa'ma ñama shondo'su Moisés'i'ccuja tsa'caen tsombi gi. Tise tsu cca'i ñama shondosundeccuma ti'tsse pañamba ñotsse tson'su. ⁸Tsa'cansi gi tise'i'ccu cambajunaccu a'tatsse aya'fai'ccu condasecco'je. Tise tsa'caen ñama cambajunaccu atte'je'ninda ¿ma'caen qui que'ija tise'ma egae afa'faya?”

⁹Na'su Chigaja tsendeccuma ñoa'me iyicca'yepa ja. ¹⁰Tsa'caen japa unjimba'cco carpa tsa'o'ye joqqitssisi tse'faei'ccuyi María pa'cco tise ttono congomba tototsse da. Aarónjan Maríama piyicamba tise ttono congo'choma atepa ¹¹Moisésnga su: “Chigáne ña na'su, ingima vanaembe canjan. Ñoa'me sumbie dapa gi va egae tsincon'chove tson'fa. ¹²Anttejama cuintsu du'shu toya ttopanga papa congol'choma isuquua'caen tise ai'vo daya'chove.”

¹³Tsa'caen susi Moisésja Na'su Chigama qqen ñajan: “Na'su Chiga, quema gi ñajan chigáne ccushaenjan.”

¹⁴Tsonsi Na'su Chigaja su: “Ñoa'me tise yaya chi'gapa cambajunga attui'choecan'da siete a'ta pa'cco tsu ansangepa can'jeñe'can. Tsa'caen tsomba tsu canqqe'ye joqqitssiangeye'can siete a'ta pa'cco. Omboe tsu ccase jiye oshaya.”

¹⁵Tsa'caen susi Maríaja canqqe'ye joqqitssiangepa siete a'ta pa'cco ccani can'jen. María ccani can'jensi aindeccuja ccani jambe'yi tse'tti tise've ronda'je'fa. ¹⁶Tsa'ma tsene María ccushapa tise'panga jisi Hazerot'ye sombopa Parán a'i menia can'jen'fa.

A'tutsse jacansundecuma moe'cho

13 ¹Na'su Chigaja Moisésma afapa qqen su:
²“Canaán andeni majan tsandiendecuma moejan cuintsu a'tutsse japa tsa ande ña que'inga afeya'choma atte'faye. Nane poi israe'su dose aindecu'su fae tsandie majan na'siacan'ma moejan.”

³Moisésja Na'su mandaqquia'caen Parán a'i menia'ñe aindecuma moe. Tsendecu poiyi'cco tsu poi israendecu'su na'siacandeqquia. ⁴Vandecu tsu ja'chondeccu: Rubén aindecu'su Samúa, Zacur dutssi'ye; ⁵Simeón aindecu'su Safat, Horí dutssi'ye; ⁶Judá aindecu'su Caleb, Jefone dutssi'ye; ⁷Isacar aindecu'su Igal, José dutssi'ye; ⁸Efraín aindecu'su Oseas, Nun dutssi'ye; ⁹Benjamín aindecu'su Palti, Rafú dutssi'ye; ¹⁰Zabulón aindecu'su Gadiel, Sodi dutssi'ye; ¹¹José aindecu'su (tsa Manasés aindecu) Gadi, Susi dutssi'ye; ¹²Dan aindecu'su Amiel, Gemali dutssi'ye; ¹³Aser aindecu'su Setur, Micael dutssi'ye; ¹⁴Neftalí aindecu'su Nahbi, Vapsi dutssi'ye; ¹⁵Gad aindecu'su Geuel, Maqui dutssi'ye.

¹⁶Tsa tsu Moisés a'tutsse jacamba cansundecuve moe'chondeccumbe inise. Moisésja Oseas, Nun dutssi'yema tsu Josuéve inisian.

¹⁷Moisésja cuintsu Canaán andema a'tutsse cambia atesu'faye moe'jemba qqen su:

—Néguev andenga japa ccotta'cco'su andeni ja'faja. ¹⁸Ñotsse in'jamba can'faja tsa andema. Toya'caen tsani can'jensundecuma can'faja: ¿Osha'faya'cho ti?—tsambi'ta, ¿patsuye'faya'cho? Toya'caen, ¿re'ricco a'i ti?—tsambi'ta, ¿tsain'bitssi? ¹⁹Tise'pa canquema'qqe ñotsse can'faja. ¿Aqquia carpani ti can'jen'fa?—tsambi'ta, ¿ttuccuni ti ta'etssia tsaoni can'jen'fa? Toya'caen, ¿tise'pa can'jen'cho ande ti ñotssia?—tsambi'ta, ¿ega? ²⁰¿Sho'yoqqe'su ande ti?—tsambi'ta, ¿ega ande? ¿Quini'cco'qqe ti jin?—tsambi'ta, ¿me'in? Dyombe'yi japa jongoesu tetacho tseni jinchoma ñani i'faja.

Ofa tsaja naite tsu Moisésja tsa'caen a'ima manda. ²¹Tsa'caen mandasi aindecuja tsa andema cañe japa Zin a'i menia'ñe ashaemba Rehobni nepi'fa. Tsa tsu Hamatni cani'jen'tti. ²²Nane Néguevma panshamba Hebróni nepi'fa. Hebróni tsu can'jen'fa Ahimán, Sesai toya'caen Talmi. Tsendecuta tsu Anac omba'su dushundecu. Hebrón canque tsu Egipto'su Zoan canquema o'tie ñoña'cho siete canque'fave panshan'cho. ²³Tsomba Escol sinjuncuni nepipa ñoa'me ñotssia na'cho o'fa tsajama atepa fae ttembani ñoa'me tsain'bitssi na jinchoma chattupa quini'cconga tandamba dos a'i opipa i'fa. Toya'caen tseni'su tsotsoqui, higoma'qqe taipa i'fa. ²⁴Tsa'caen israendecu ofa tsajama tseni chattu'chosi tsu tsa sinjuncuma Escolve inisian'fa.

²⁵Cuarenta a'ta tsa'caen tsa andeni jacamba shandapa ²⁶toequi Cadesni jipa Parán a'i menia nepi'fa. Tse'tti tsu Moisés Aarón toya'caen poiyi'cco israendecu can'jen'fa. Tsa'caen nepipa tisupa japa atte'choma condasepa tseni'su teta'choma'qqe canjaen'fa. ²⁷Canjaemba Moisésnga su'fa:

—Ja'fa gi que ingima manda'cho andeni. Ñoa'me tsu tsenijan chocho toya'caen tuño cuñajun'cho'qqe shacaya'bi. Toya'caen va tsu tseni naqqe'su teta'cho. ²⁸Tsa'ma tseni'su aindecuaja ñoa'me osha'faya'cho tsu. Toya'caen tise'pa canqqeja ñoa'me randepa ñotssse ttu'choni tsa'oja sheque. Toya'caen tsenima gi atte'fa rande a'i, Anac omba'su dushundecuma. ²⁹Néguevnijan amalecitandecu tsu can'jen'fa. Ccotta'cco'su andenijan hititandecu, jebuseondeccu toya'caen amorreondeccu can'jen'fa. Toya'caen mar ofafa'ye Jordán naeni tsu cananeondeccumbe ande.

³⁰Tsama pañamba Calebja Moisési'ccu afa'je'cho aindecuma ziyaemba qqen su:

—¡Jinge japa tsa'su aindecuma joqqitssiamba tsa andema isuye!
¡Ingija osha'faya gi tsa andema itsaye!

³¹Tsa'ma tisei'ccu fae'ngae japa ji'chondecuaja qqen su'fa:

—¡Me'in! ¡Osha'faya'bi gi tsa'su aindecuma ganañe! ¡Tsendecuta tsu ingima ti'tsse osha'faya!

³²Tsa'caen supa tsa ande tise'pa can'ga'choja ñoa'me ega ande qqen suye ashaemba qqen su'fa:

—Tsa ingi can'ga'cho andenijan tisupanaccu fi'ttico'je'fa. Toya'caen poiya'cco tseni'su tsandiendecuja ñoa'me randepa quinsetssi'fa. ³³Toya'caen gi atte'fa tsa rande a'i Anac omba'su dushundecuma'qqe. Ingita gi tisupama in'jan'fa ttombia'cancho'cco. Nane tsendeccu'qqe tsu tsa'cancho'coe ingima caña'jen'fa.

Israendeccu injanga tson'cho

14 ¹Osha'faya'bi qqen su'choma pañamba israendecuja fundo'jeye ashaemba tsequi cose inambai'ccu a'ta'fa. ²Poiya'cco tsendeccu tsu Moisés toya'caen Aarónma egae afapa qqen su'fa: “¡Egiptoni tsambi'ta va a'i menia pa'choecan'da bove ñotssiye'can! ³¿Jongoesie tsu Na'su Chigaja va andeni ingima i? ¿Geraemba vani ingi pasi cuintu ingi'ccu iyiccosundeccu ingi pushendeccu, ingi dushundecuma'qqe ita'faye ti ingima i? ¡Nane bove ñotssi tsu toequi Egiptoni jaye!” ⁴Tsa'caen supa tisupanaccu qqen afacco'fa: “Jinge faesu na'suve somboemba toequi Egiptoni jaye.”

⁵Tsonsi Moisés toya'caen Aarón poiya'cco aindecu caña'jen'ni camba'jui'ccu andenga puntssamba cuu'fa. ⁶Toya'caen Josué, Caleb'qqe fae'ngae andema cañe jacansundecupa tisupa ñombi'ye'choma canjañe in'jamba ondiccu'jema chi'ttapa ⁷poiya'cco aindecunga qqen su'fa:

—¡Tsa ande ingi can'ga'choja ñoa'me ñotssia ande tsu! ⁸Na'su Chiga ñoa'me ingima in'jan'da tsu fuitepa tsa andenga ingima ca'niamba tsangae afeya. Nane tsa ande tsu chocho toya'caen tuño cuñajun'cho'qqe shacaya'bi. ⁹¡Tsa'ma Na'su Chigama pañambiqquia'caen tson'fajama ni tsa ande'su aindecuma dyo'fajama! Nane tsendecumanda gi panma anquua'caen patsu'faya. Toya'caen majan tise'pama fuiteya'chove me'i'on tsu. Tsa'ma ingimajan Na'su Chiga tsu fuiteya. Tsa'cansi —¡Dyo'fajama!

¹⁰Tsama pañamba aindecuaja patui'ccu tovaccoeñe in'jan'fa. Tsonsi Na'su Chigambe ñotssiaja cachuicco'je'cho carpanga attian poiya'cco israendeccu caña'jen'ni. ¹¹Tsa'caen attiamba Na'su Chigaja Moisésnga su:

—¿Mi'ng'e' tsu aindecuaja ñama chi'gapa 'Barembi tsu' qquen su'je'faya? ¿Toya'caen mi'ng'e' tsu ñame in'jambiqquia'caen canse'faya? Nane tsain'bitsse tise'panga ña oshacho'choma canjaensi atte'ma tsu ñame in'jan'fambi. ¹²Nane ñoa'me paqqe'suma gi tise'panga moeña cuintsu andema isumbe'yi pa'faye. Tsa'ma quei'ccu gi ñoa'me tsain'bitssi aindecuve atapoemba va israendecuma ti'tsse quin'andecuve tsoña.

¹³Tsama pañamba Moisésja Na'su Chiganga su:

—Queyi qui tisu oshacho'choi'ccu va aindecuma Egiptone somboen. Tsa'cansi egiptondecu va que tsoñe su'choma paña'da ¹⁴tsu Canaán andesundecunga condase'faya. Nane tsendeccu'qqe tsu que qquen su'choma paña'fa: 'Queja, Na'su, israendecui'ccu can'jemba cambajunaccu tise'pai'ccu afa'je; toya'caen que unjimba'cco'qqe tise'pa canque ombani dusepa a'taja unjimba'ccove attiamba tise'pama o'tie jayi; coseja si'ng'eve attiamba tsa'caen jayi.' ¹⁵Tsa'cansi va aindecuma que metsse fi'tti'ninda tsu tsa'caen paña'chondecuaja qquen su'faya: ¹⁶'Na'su Chigaja tise afeye su'cho andema tise'panga afeye oshambipa injanga a'i menia israendecuma fitti'tti.' ¹⁷Tsa'cansi, Na'su Chiga, canjaenjan que oshacho'choma que tayo inginga suqquia'caen. Queyi qui su: ¹⁸'Ñajan junde iyicca'yeye atesumbi.' Ñoa'me ñotsse qui injancho. Egae tsinconsundeccu, toya'caen pañambiqquia'caen tsinconsundeccu tsincon'choma qui aqqe'papa ñoquiya. Tsa'ma quema chi'gapa egae tsincon'sumbe injama'choma somboemba tise dushundecumbe, tsambe du'shumbe dushundecumbe toya'caen tsambe dushundecumbe injama'choma qui somboeña. ¹⁹Chigáne que ñoa'me injancho'choma canjaemba va aindecu egae tsincon'choma aqqe'papa ñoquiya. Nane ñoa'me tise'pa Egiptoni can'jeinte ashaemba vani nepiya'ngae tise'pama mende'yepa ñoquiquia'caen ccase mendeyepa ñoquiya.

Chiga israendecuma vanae'cho

²⁰Na'su Chigaja qquen su:

—Ñotssi tsu, que inñajanquia'caen gi aqqe'papa ñoquiya. ²¹Tsa'ma va tsu ñoa'me su'cho. ¡Nane ñoa'me ña cansepa ña ñotssi'ccu pa'cco andenga ñoa'me on'boenquia'caen tsu va su'choja ñoa'me su'cho! ²²⁻²³Ñoa'me tsu va aindecuaja ña tayopi'su coenzandecunga afeye su'cho andema atte'faya'bi. Nane ña ñotssiaja, toya'caen ña oshacho'choma Egiptone vani a'i menia'qqe atte'ma tsa andema atte'faya'bi. Nane a'i menia ña tise'pama fi'ttite ñama tsain'bitsse noñangiamba ña manda'choma pañañe chi'ga'chondecu tsu tsa andema atte'faya'bi. Ñama chi'gapa 'Barembi tsu' qquen su'chondecupa tsu tsa andema atte'faya'bi. ²⁴Jo'su ñama shondo'su Calebyi tsu tise injama'cho ccaninga'pa ñoa'me ñama ñotsse

in'jamba paña. Tsa'cansi gi tise ma antteya cuintsu tise can'ga'cho andenga ca'niñe. Toya'caen tise omba'su dushundeccu tsu tseni tsangae canse'faya. ²⁵Amalecitandecu, cananeondeccu tsu tsa ande'su sinjuncuni can'jen'fa. Tsa'cansi que'lja tu'iyi toequi a'i menia tsa Cu'a marni ja'jengae ja'faja.

²⁶Tsomba Na'su Chigaja Moisés toya'caen Aarónge qquen su:

²⁷—¿Mi'nge'e gi va ega Israel aya'fanasindecu'ccu vana'jeña? Tayo gi paña tise'pa ñama egae afa'je'choma. ²⁸Japa tise'panga ñane condaja: 'Na Na'su Chiga gi ñoa'metsse su: Que'i vana'jen qquen in'jamba iyicca'yepa su'choma pañamba gi ja'ño tsa'caen que'inga tsoña. ²⁹Nane poi'cco veinte canque'fama ti'tsse an'bian'chondeccu, tayo agattoye'chondeccu, tsa ñama egae afasundeccu tsu pa'faya. Pa'chondeccumbe ai'vota tsu a'tusi a'i menia catiye'faya. ³⁰Nane ñoa'me gi su ni majañi'qqe que'i'suja ña ñoa'metsse su'choi'ccu afeye su'cho andenga ca'ni'faya'bi. Jo'su Caleb, toya'caen Josuéyi tsu tsanga ca'ni'faya. ³¹Tsa'ma que'i'ccu iyiccosundeccu itsa'faya qquen su'cho dushundecuma gi tsa andenga angapa ca'niaña. Nane que'i tsa andema chi'gasi gi que'i dushundecunga afeya cuintsu tsa andema isupa avuja'faye. ³²Que'i pasi que'i ai'voja a'tupa va a'i menia catiye'faya. ³³Tsa'cansi que'i dushundecuja cuarenta canque'fave ovejama coirasundecuve dapa que'i poi'cco pa'faya'ngae a'i menia canse'faya. Nane tsa'caen tsomba tsu que'i egae tsincon'cho shacama nanitsse afepoen'faya. ³⁴Cuarenta a'ta qui a'tutsse tsa andema cañe jacan'fa. Tsane qui cuarenta canque'fa pa'cco tisupa shacama afepoen'jen'faya. Nane fae a'tane fae canque'fave vanaña'cho. Tsa'caen vana'jemba qui in'jan'faya ñai'ccu iyicco'je'chove.' ³⁵Ña Na'su Chiga gi vama ñoa'metsse su: Tsa'caen gi va ega aindecu fae'ngae bopa ñama chi'gasundecunga tsoña. Va a'i menia tsu tise'pa sefaya'cho. Va'ttinga tsu pa'faya.

Diez cañe jacansundeccu pa'cho

³⁶⁻³⁷Moisés mandasi a'tutsse cañe jacansundeccu tsene jipa majandecuja ñotsse condambe afopoemba aindecuma qquejccoen'fa. Tsa'caen tson'fasi Na'su Chigaja poi'cco tsendecuma paqqe'sui'ccu fi'tti. ³⁸Jo'su Josué toya'caen Calebyi tsu pambe pasa'fa.

Israendecuma Hormani patsu'cho

³⁹Na'su Chiga Moisésnga su'choma israendecunga condasesi poi'cco ñoa'me ñombi'ye'fa. ⁴⁰Tsa'caen pañamba ccaqui a'ta sinte'yi jangipa ccotta'cco'su ande se'fatssianga ansundepa qquen su'fa:

—Tayo gi va'tti'fa. Jinge japa Na'su Chiga inginga afeye su'cho andema isuye. Nane ñoa'me gi Chiga suqquia'caen egae tson'fa. ⁴¹Tsa'ma Moisésja su:

—¿Micomba qui Na'su Chiga su'choma paña'fambi? ¡Va que'i tsoña'choja ñotsse daya'bi! ⁴²Jambe can'faja. Na'su Chigaja que'i'ccu can'jembi. Que'i'ccu iyiccosundeccu tsu ai'yembitsse que'ima patsu'faya.

⁴³Nane tayo tsu ronda'je'fa amalecitandecchu, cananeondeccu'qqe que'i'ccu iyiccopa que'ima fitti'ttiye. Ñoa'me gi su tayo qui Na'su Chigama catisi tise'qqe que'ima catipa ja'ñojan que'i'ccu jacambi.

⁴⁴Tsa'caen susi paña'ma tsendeccuja ti'tsse cotta'cco'su ande se'fatssianga ansunde'fa. Tsa'ma Na'su Chiga a'i'ccu fae'ngae injancco'fa'cho cafon ni Moisés'qqe canqqe'ye tsendeccui'ccu fae'ngae sombombi. ⁴⁵Tsa'caen ja'fasi amalecitandecchu, cananeondeccu'qqe tsa andeni can'jensundeccupa israendeccui'ccu iyiccoye sombo'fa. Tsa'caen sombopa Hormani ne'pitsse israendeccuma fitti'ñacca anga moe'fa.

Chiga Corésma fi'tti'cho

16 ¹⁻²Levita a'i Coat omba'su du'shu Coré qqen inisecho'cho, tsa Izhar dutssi'ye tsu Moisésma chi'gapa iyicca'ye. Tisei'ccu fae'ngae tsu tres tsandie Moisésma chi'gapa iyicca'ye'fa. Tise'pa inise tsu Datán toya'caen Abiram, Eliab dutssiyendeccu, toya'caen On, Pelet dutssi'ye. Tise'pai'ccu fae'ngae tsu faesu dosciento cincuenta israendeccuma mandasundeccu'qqe bo'fa. Tsendeccu'su tsu majanjan israe'su coenzandecchusi poi'yi'cco a'i tise'pama ñotsse injan'jen'fa. ³Poi'yi'cco tsendeccu tsu bopa Moisés toya'caen Aarónma afasepa qqen su'fa:

—¡Tayo tsu naniña'cho que'i ingima ti'tsse'tssia've da'choma! Nane poi'yi'cco gi Chiga aindecchusi tsu Na'su Chigaja poi'yi'cco ingi'ccu can'jen. Tsa'ma, ¿jongoesie qui que'ija Na'su Chiga aindecchumbe Na'su qqen in'jan'fa?

⁴Tsama pañamba Moisésja camba'ju'i'ccu andenga puntssan ccuipa ⁵Coré toya'caen tisei'ccu jacansundeccunga qqen su:

—Tu'i sinte tsu Na'su Chigaja que'inga canjaeña majan tise'beve toya'caen majan tise in'jamba ttu'se'cho cuintsu Chiganga afe'je'choma afeye. Nane tise in'jamba ttu'se'choyi tsu tisenga afeye osha. ⁶Qquen tsu tsoña'cho: Coré toya'caen tisei'ccu fae'ngae in'jan'chombe ñome'bama oque oraen'jen'cho tasama tsu iya'cho. ⁷Tu'ija tsanga si'ngema ppiñamba ñome'bama'qqe tuiñaña'cho cuintsu o'roye. Tsomba Na'su Chiganga i ccutsiaña'cho. Majama Na'su Chiga in'jamba canjaensi tsaja Chigambe tisia've somboen'cho tsu. ¡Tsa'caen canjaensi naniña'cho tsu, levítandecchu!

⁸Omboe Moisésja Coréma su:

—Ñama paña'faja levítandecchu: ⁹¿Israendeccumbe Chiga poi israendeccu'ye que'ima ttu'sepa manda'choja ñotssimbi qqen ti qui in'jan'fa? Nane que'ija ñoa'me Chigai'ccu pporotsse can'jemba tise can'jen'tti'su jincho'choma vase'je'fa. Toya'caen qui poi israendeccuma fuitesundeccu'fa. ¹⁰Na'su Chiga que'ima in'jamba poi'yi'cco que'i aindecchuma'qqe in'jan cuintsu tisei'ccu pporotsse can'jen'faye. Tsa'can'ma— ¿jongoesie qui ti'tsse joccapitssia Chigama afa'suve daye in'jan'fa? ¹¹Jo'su Aarónmeñi afase'fambi qui. Tiseja ti'tsse'tssimbi tsu cuintsu que'i tisema afaseye. Ñoa'me Na'su Chigama qui chi'gapa afase'fa.

¹²Omboe Moisésja manda cuintu Dotán toya'caen Abiram tsa Eliab duttsiyendecuma ttusenga'faye. Tsa'ma tsendeccuja su'fa:

—Jaye in'jan'fambi gi. ¹³¿Ñotssi tsu' qquen ti qui in'jan que ingima chocho, tuño cuñajun'cho shacambitssia ande'ye joqqutssiansi cuintu va a'i menia qquipo'e'supa pa'faye? Toya'caen: ¿Ñotssi tsu' qquen ti qui in'jan ingima ti'tsse joccapitssia na'suve daye qquen in'jamba? ¹⁴Toya qui ingima angambi chocho, tuño cuñajun'cho'qqe shacambitssia andeni. Ni ingi nasipaemba tsajaccuve joña'cho ande'qqe qui afembi. ¿Ingija binindequua'caen injanga quei'ccu ja'faya qquen ti qui in'jan? Nane quema can'gi'faya'bi gi.

¹⁵Tsa'caen su'fa'choma pañamba Moisésja ñoa'me iyicca'yepa Na'su Chiganga su:

—¡Tise'pa quenga afe'je'choma in'janjama! Ñanda gi ni fae boroveyi'qqe tsendecuma itsambi. Toya'caen majameñi'qqe gi egae tsonbi.

¹⁶Omboe Moisésja Corénga su:

—Tu'i Na'su Chiganga ji'faja que, toya'caen quei'ccu fae'ngae in'jan'chondeccui'ccu. Aarón'qqe tsu tse'tti can'jeña. ¹⁷Poiyi'cco tsu tise'pa oque oraen'jen'cho tasama ipa tsanga oque oraenqqe'su ñome'bama tuiñaña'cho. Toya'caen Aarón, que'qqe tisu oque oraen'jen'cho tasama angapa oque oraenqqe'su ñome'bama tuiñamba cca'i dosciento cincuentandecumbe ccutsu'choi'ccu fae'ngae Na'su Chiganga ccutsu'faya'cho.

¹⁸Tsa'caen susi poi'yi'cco tisupa oque oraen'jen'cho tasama ipa si'ngema on'boemba oque oraenqqe'su ñome'bama tuiñamba Moisés toya'caen Aarónmbe ccutsu'ttinga ccutsian'fa. Chigama cachuicco'je'tti'su carpa jin'ttinga tsu tsa'caen ccutsian'fa. ¹⁹Coréja poi'yi'cco aindecu'ccu bopa tsa Chigama cachuicco'je'tti'su carpa jin'ttini Moisés'pama isevetsse ccutsu. Tsa'caen ccutsu'fasi Na'su Chiga ñotssiaja poi aindecunga attiansi ²⁰Na'su Chigaja Moisés toya'caen Aarón'ca su:

²¹—¡Joqqutssi'faja va aindecu ccutsu'ttie! ¡Junde gi tise'pama nepiañe tson'jen!

²²Tsa'ma Moisés Aarón'qqe andenga puntssan ccuipa qquen su'fa:

—Chiga Quitsa, que qui poi aindecuma cansian'su. ¿Tsa'caen ti qui fae a'i egae tsincon'chone poi aindecuma iyicca'yeya?

²³Tsa'caen susi Na'su Chigaja Moisés'nga su:

²⁴—¡Poiyi'cco israendecunga condaja cuintu Coré, Datán toya'caen Abiram ccutsu'ttie junde joqqutssi'faye!

²⁵Tsama pañamba Moisésja jangipa israe'su coenzandecui'ccu Datán, Abiram can'jeni ja'fa. ²⁶Japa poi'yi'cco aindecunga qquen su'fa:

—¡Junde joqqutssi'faja va ega aindecu carpa'ye! Toya'caen tise'pa an'bian'choma pporaen'fajama tise'pa egae tsincon'chone que'i'qqe pa'fasa'ne.

²⁷Tsa'caen susi aindecu'ca Coré, Datán toya'caen Abiram carpa jin'tti'ye joqqutssi'fa. Datán toya'caen Abiram tsu tise'pa carpa cani'je'tti can'jen'fa fae'ngae tise'pa pushendeccu, toya'caen tise'pa dushundecui'ccu. ²⁸Toya'caen tsu Moisésja su:

—Tisutsse ña tsoñe oshambisi Na'su Chiga ñama moesi gi pa'cco ña tson'jen'choma tson'jen. Tsa'camba qquen tsonsi qui in'jan'faya Na'su Chiga ñama moe'chove: ²⁹Nane va aindeccu cca'li paqquia'caen coenza ccashe'yeve dapa pa'fa'ninda qui in'jan'faya Na'su Chiga ñama moembi'choa've. ³⁰Tsa'ma Na'su Chiga ccaningae tsomba andema shariensi va aindeccuma cunde'ninda qui Na'su ñama moe'chove in'jan'faya. Nane andema shariensi canseveyi aindeccu, pa'cco tise an'bian'choma cunde'ninda qui in'jan'faya tsendeccu tsu Na'su Chigama chi'ga'chondeccu.

³¹Tsa'caen Moisés afa nanisi andeja tsendeccu ccutsu'ttie sharuqquia'caen tsu doin ja. ³²Tsa'caen doin jasi poiyl'cco tsandideccu Coré'ccu bo'chondeccu tise'pa pushe, dushundeccu'qqe, tisupa an'bian'choi'ccu fae'ngae ande tsosini amppi ja'fa. ³³Canseyi pa'cco tise an'bian'choi'ccu ande tsosini amppi ja'fasi andeja toeningatsse da. Tsa'caen tsu israendeccu'ye nepi'fa. ³⁴Tsa'caen tsonsi atepa poiyl'cco israendeccu pporotsse ccutsusundeccuja fundopa tse'ttie buttopa sombopa qquen su'fa: “¡Isha tsu ingima'qqe andeja cundeya!” ³⁵Toya'caen tsu Na'su Chigaja si'ngema moemba dosciento cincuenta tsandideccuma fi'tti tsa oque oraenqqe'su ñome'bama afesundeccoma.

³⁶Na'su Chigaja ccase Moisésnga afapa qquen su:

³⁷“Chigama afa'su Aarón dutssi'ye Eleazarma suja cuintu japa tsa juru'je'chonga catsepa ñome'bama oque'je'cho tasama isuye. Isupa tsani jincho si'ngema biani tuiña catiye. ³⁸Nane tsa oqueye'chondeccuja egae tsomba tsa'caen pa'fa. Tsa'ma tise'pa ñome'bama oque'je'choja ñanga afe'je'chopa tsu toya ñane'jan ñotssi. Tsa'cansi tsama isupa Chiganga afeye oque'je'choma oppoen'jeña'chove ñoña'faja. Tsa'caen ñoñamba oppoen'faja cuintu israendeccu tsa ju'ru'choma injan'jen'faye.”

³⁹Tsa'caen susi Chigama afa'su Eleazarja tsa oque'jepa pa'chondeccumbe cu'la yoshava ñome'bama oque'je'cho tasama taipa manda cuintu oque oraen'je'choma oppoen'jeña'chove ñoñamba tsanga oppoen'faye. ⁴⁰Tsa'caen tsu tson'fa cuintu israendeccu tsama atepa jo'su Aarón dushundeccu'yi tsu ñome'bama afe'je'ye oshal'fa qquen injan'jen'faye. Nane majañi'qqe cca'lija tsa'caen catsepa Na'sunga afeye oshambi, Coré toya'caen tisia'caen in'jan'chondeccu paqquia'caen pasa'ne. Na'su Chiga Moisés'ccu Eleazarnga mandaqquia'caen tsu pa'ccoma tson'fa.

⁴¹Ccaqui a'ta poiyl'cco israe'su aindeccu Moisés toya'caen Aarónma afaseye ashaen'fa qquen supa:

—Que'i qui Na'su Chigambe aindeccoma fi'tti'je'fa.

⁴²Poiyl'cco a'i shoquendi'e Moisés Aarón ccutsu'ttinga bo'fa. Tsa'ma tsa'caen bopa Cachuicco'je'tti'su carpama cambia tse'faei'ccuyi atte'fa unjimba tsa carpama picco'choma, toya'caen Na'su Chigambe ñotssia attian'choma. ⁴³Tsa'caen atepa Moisés toya'caen Aarón tsa Cachuicco'je'tti'su Carpa jin'ttinga jasi ⁴⁴Na'su Chigaja Moisésnga su:

⁴⁵—¡Jocquittsi'faja va aindeccu'ye! ¡Junde gi tise'pama fi'ttiye tson'jen!

Tsama pañamba Moisés toya'caen Aarón andenga puntssan ccuipa
 46 Moisésja Aarónja su:

—¡Que ñome'bama oque'je'choma i'ngapa Chiganga afeye oque'je'cho
 si'ngema on'boemba ñome'bama'qqe tuiñajan! ¡Tsa'caen tsomba junde
 aindeccu can'jeni japa Chigama iñajanjan tsendeccu egae tsincon'chone
 joqqitssiya'chove! Noa'me tsu Na'su Chigaja iyicca'yepa fi'ttiye tson'jen.
 Nane tayo tsu paqqe'sui'ccu paye ashaen'fa.

47 Aarónjan Moisés suqquia'caen tsomba aindeccu bojin shequeni
 buttopa ja. Buttopa japa atte Chiga moe'cho paqqe'su tayo aindeccuma
 fi'ttiye ashaen'choma. Attepa Aarónjan ñome'bama tise oque'je'cho
 tasanga tuiñamba aindeccune Chigama iñajan. 48 Omboe Aarónjan
 pa'chondeccumbe toya cansendecumbe enttingenga ccutsusi tsa
 paqqe'suja pasa. 49 Nane Coréi'ccu aindeccu pa'fasi toya'caen ccaqui tsu
 faesu catorce mil seteciento a'i tsa'cantsse pa'fa. 50 Tsa'caen paqqe'su
 pasasi Aarónjan toequi Cachuicco'je'tti'su carpani Moisés can'jen'chonga ji.

Aarón accuicco'cho shoyocho'cho

17 1 Na'su Chigaja Moisésnga su:

2 “Israendecunga condaja cuintsu poi israenaccumbe nasundeccu
 tise'pa accuicco'choma i'faye. Poiyi'ccota tsu doce accuicco'choya. Que
 qui tevaña'cho poi accuicco'chonga nasundecumbe inisema. 3 Toya'caen
 Leví aindeccu'su accuicco'chongata tsu Aarón inisema tevaña'cho. Nane
 poi aindeccu'su nasundeccu tsu fae accuicco'choma iya'cho. 4 I'fasi tsu
 Cachuicco'je'tti'su carpanga angapa injancco'fa'chove canjaen'cho cafon ccui'ttinga
 ccuiña'cho, tsa ña que'i'ccu cachuicco'je'ttinga. 5 Ña gi tsoña cuintsu majame
 ña in'jan'chombe accuicco'choja shoyochoye. Tsa'caen shoyochosi attepa tsu
 israendeccuja que'ima egae afa'je'choma anttepa ñama noñangiambe can'faya.”

6 Moisés Na'su Chiga su'choma israendecunga condasi poiyi'cco
 israenaccu'su nasundeccu tise'pa accuicco'choma i'fasi doce accuicco'chove
 boña. Tsa'suni tsu Aarón accuicco'cho'qqe ccui. 7 Moisésja tsa accuicco'cho
 boña'choma isupa Na'su Chiga can'jeni Cachuicco'je'cho carpani ccuiña.
 8 Ccaqui a'ta tsa Cachuicco'jeni japa atte Aarón accuicco'cho tsa Leví
 aindeccu'sumbe accuicco'cho tayo shoyocho'choma; nane tayo shoyochopa,
 te'tapa, almendra cu'chove na'choma. 9 Tsa'caen dasi Moisésja poiyi'ccombe
 accuicco'choma Na'su Chiga can'jene somboemba poiyi'cco israendecunga
 canjaen. Poiyi'cco atte'fasi accuicco'chombe nasundeccuja tisumbema isu'fa.

10 Tsonsi Na'su Chigaja Moisésnga su: “Aarón accuicco'chomajan ccase
 injancco'fa'cho cafon ccui'ttinga ccuiñajan. Tseni coira'jeja cuintsu va
 ñama pañambindeqquia injan'jen'faye. Tsama injan'jemba tsu ñama egae
 afambe'yi cansepa pambe canse'faya.”

11 Moisésja pa'cco Na'su Chiga su'choma tson. 12 Tsa'ma israendeccuja
 Moisésnga su'fa: “¡Ingita gi qqe'chondeccu! ¡Poiyi'cco gi pa'faya! 13 Nane

poiye'cco majan Na'su Chiga can'jen'chonga catse'ta tsu pa'faya. ¿Pa'cco metsse ti gi pa'faya?"

Tsa'ccu patuvo'cho'ye sombo'cho

20 ¹Cuna canque'fa ca'nimba nepi'cho ccovuni tsu israendecuja Zin a'i menia nepi'fa. Tsomba Cadesni re'ricco can'jen'fa. Tseni can'jemba María pasi tse'ttinga a'tu'fa.

²Aindeccuja tsa'ccuve metsse dasi poiye'cco Moisés, Aaróna bopa ³qquen Moisésnga afaye ashaen'fa:

—Faesu israendecuma Na'su Chiga fi'ttijeite ingima'qqe fi'tti'choecan'da tsu ñotssiye'can. ⁴¿Jongoesie qui Na'su Chigambe aindecuma va a'i menia i'fa? ¿In'jan'fa ti qui ingi tisupa vaurandecui'ccu fae'ngae paye? ⁵¿Jongoesie qui ingima Egiptone somboemba va ega andeni i'fa? Vanija mani joña'chove jinchombi. Nane higeraccu, tsajaccu, tsotsoquiccuve'qqe metssi. Toya'caen ni tsa'ccuyi'qqe jinchombi ingi cui'ya'chove.

⁶Tsa'caen su'fasi pañamba Moisés toya'caen Aarón tse'ttie joquitssipa Cachuicco'je'tti'su Carpani japa tse'ttinga camba'ju'ccu andenga puntssamba ccui'fa. Puntssan ccui'fasi Na'su Chigambe ñotssia tise'panga attiamba ⁷Na'suja Moisésnga su:

⁸—Accuicco'choma somboemba isupa, que quindya fuite'choi'ccu a'ima boñajan. Poiye'cco bo'fasi patuvo'choma mandaja cuintsu tsa'ccu tsa'ye somboye. Tsa'caen mandapa qui atteya aindecu toya'caen tise'pa vaurandeccu cui'ye sombo'cho tsa'ccuma.

⁹Moisésja Na'su Chiga suquia'caen tise can'jeni ccui'cho accuicco'choma isupa sombo. ¹⁰Sombopa Moisés toya'caen Aarón aindecuma boña'fa patuvo'cho jin'ttinga. Tsomba Moisésja su:

—Ega pañambi'choa aindecu paña'faja: ¿Ingi ti gi va patuvo'cho'su tsa'ccuma somboemba afe'faya'cho cuintsu que'i cui'faye?

¹¹Tsa'caen supa Moisésja dos se tsa patuvo'choma tise isu'cho accuicco'choi'ccu ochhai. Tsa'caen ochhaisi tsain'bitssi tsa'ccu tsa'ye sombo. Sombosi aindecu toya'caen vaurandeccu'qqe cui'ye ashaen'fa.

¹²Tsa'ma Na'su Chigaja Moisés toya'caen Aaróna su:

—Nane que'ija ñama in'jambiquia'caen tisuyi tsa'ccuma afe qqen supa israendecunga ñajan tise'pama fuite'suve canjaembi. Tsa'camba qui va aindecu'ccu ña tise'panga afe'cho andeni ca'ni'faya'bi.

¹³Tsa tsu Meribani tsa'ccu sombo'je'tti. Tse'ttiyi tsu israendeccu Na'su Chigama afacco'fasi tiseja egave metssi qqen canjaemba'tti.

Edom andema panshañe se'pi'cho

¹⁴Cadesni can'jemba Moisésja majan aindecuma Edom ande'su na'sunga moe cuintsu japa qqen suye: “Que antian israendeccu tsu qqen quema su'fa: ‘Queta qui ñotsse atesu ingi ma'caen vanamba canse'choma. ¹⁵Nane ingi tayopi'su

coenzandeccuja Egiptoni japa bo'tsse tseni canse'fa. Tsa'ma egiptondecu
ingima in'jangae tsincon'fa ingi tayopi'su coenzandecuma tsinconqquia'caeni.
16 Tsa'caen vana'jemba gi Na'su Chigama in'ajan'fa cuintsu ingima fuiteye.
Tsa'caen ingi in'ajan'fasi tsu tisema sefacconi'su shondo'suma moemba Egiptone
ingima somboen. Ja'nonda gi Cades canqueni can'jen'fa que andei'ccu pporotsse.
17 Tsa'camba gi in'ajan'fa: Antteja ingi que ande'ye panshañe. Ingija que'i nasipa
jon'cho'ye ni tsajaccu'ye panshañambi ni que'i poso'su tsa'ccuma cu'ifaya'bi. Nane
na'sumbe rande tsaiqui'ye gi attufambe'yi ja'faya que andema panshaña'ngae.' ”

18 Tsa'ma Edom ande'su na'suja su:

—¡Ña ande'ye panshañe osha'fambi qui! ¡Nane ji'fa'ninda gi ña
sundarondecui'ccu jipa se'piya!

19 Tsa'caen susi israendeccuja ccase qquen su'fa:

—Nane na'sumbe rande tsaiqui'ye gi ja'faya. Toya'caen ingi tsombi'ta
ingi vaura que'i poso'su tsa'ccuma cu'i'ninda gi afepoen'faya. Tsa'ma jo'su
tsui panshaña'ccoeyi gi que andema in'jan'fa.

20 Tsa'caen su'fasi Edom ande na'suja su:

—¡Nane panshan'faya'bi qui!

Tsa'caen supa tise sundaro tsain'bitssi fi'ttiqqe'suve an'bian'chondecui'ccu
israendecuma cachuiye ji. 21 Jipa ñoa'me se'pi'fa israendeccu tise ande'ye
panshañe. Tsa'caen se'pi'fasi israendeccuja faesu tsaiquive tta'ta'fa.

Aarón pa'cho

22 Poiyi'cco israendeccu Cadesne sombopa Hor ccotta'cconga ja'jengae
ja'fa. 23 Tse'tti, Edom ande pporotsse, Na'su Chigaja Moisés toya'caen
Aarónga qquen su:

24 “Aaróna tsu ña israendecunga afe'cho andeni ca'nimbe'yi paya.

Nane Meriba tsa'ccu sombo'je'ttinga qui ña mandaquia'caen tsombipa tisu
in'janquia'caen tson'fa. 25 Moisés, que qui Aarónma toya'caen tise dutssi'ye
Eleazarma'qqe Hor ccotta'cco tansin'choni angaya'cho. 26 Angapa tse'ttinga
Aarón Chigama afa'su ondiccu'je'choma oshichhaemba tise dutssi'ye
Eleazarnga ondiqqianjan. Nane tse'ttinga tsu Aarónjan paya.”

27 Moisésja Na'su mandaquia'caen tson. Nane poiyi'cco israendeccu
caña'jen'ni Hor ccotta'cconga ansunde'fa. 28 Ansundepa Moisésja Aarón
Chigama afa'su ondiccu'jema oshichhaemba Eleazarnga ondiqqian.
Tse'ttinga Aarónjan ccotta'cco tansin'choni pa. Tsa'caen pasi tisema
a'tupa Moisés toya'caen Eleazar ccotta'cco'ye ande'fa. 29 Israendeccuja tsa
Aarón pa'choma pañamba treinta a'ta tisene i'na'fa.

Horma'su aindecu patsu'cho

21 1 Israendeccu Atarim tsaiqui'ye jiña'fa qquen pañamba Cananeo ande'su
Arad canque na'su, tsa Néguevni canjen'suja, israendecui'ccu iyiccoye
ji. Jipa majandeccumajan indipa ángaja. 2 Tsa'caen tson'fasi israendeccuja Na'su

Chigama ñoa'me su'choi'ccu qqen su'fa: “Nane que va aindeccuma patsuye ingima fuite'ninda gi poi'yi'cco va ande'su canquema metsse sefaen'faya.”
 3Tsa'caen ñajan'fasi Na'su Chigaja tise'pa ñajanquia'caen tsomba fuite cuintu tsesu cananeondeccuma patsufaye. Tsa'caen fuitesi israendeccuja tsesu cananeondeccuma metsse sefaen'fa. Tsa'caeni tise'pa canquema'qqe tson'fa. Tsa'caen sefaemba tsu tse'ttima Horma qqen inisian'fa.

Cu'a yoshavama ñoña'cho iyo

4Israendeccuja Hor ccotta'ccone sombopa Cu'a Marni ja'jengae ja'fa, Edom andenga battimbe'yi ccafae jaye. 5Utu tsaiquingayi aindeccuja tsu injan'jen'choma qqe'pa Chiga Quitsa toya'caen Moisésma qqen afase'fa:

—¿Jongoesie qui ingima Egiptone somboen'fa? ¿Va a'i menia jipa pa'faye in'jamba ti qui somboen'fa? Nane tsa'ccu ni aña'chove'qqe me'cho'fa gi. ¡Panshaen toesu manámeñi amba gi tsangaeyi chi'ga'fa!

6Tsa'caen afase'fasi Na'su Chigaja in'dia iyoma moesi jipa sinttu'fasi tsain'bitssi israendeccu pa'fa. 7Tsa'caen pa'je'fasi Moisésni japa qqen su'fa:

—¡Na'su Chiga toya'caen quema'qqe afasepa gi ñoa'me egae tsincon'fa! ¡Na'su Chigama ñajanjan cuintu ingi'ye iyoma joquittsiañe!

Tsa'caen su'fasi Moisésja Na'su Chigama ñajan cuintu israendeccu egae tsincon'choma aqqe'paye. 8Ñajansi Na'su Chigaja qqen su:

—Tsa'cantsse tsesu iyove cu'a yoshavama ñoñamba quini'cconga ottaemba se'fatsse dyaiñajan. Tsa'caen dyaiñasi majan iyo'nga sinttuyepa tsa ñoña'cho iyoma can'da tsu ccusha'je'faya.

9Moisésja Chiga mandaquia'caen cu'a yoshavama iyove ñoñamba quini'cconga ottaemba dyaiña. Tsa'caen dyaiñasi tsu majan iyonga sinttuyepa tsa ñoña'cho iyoma can'da ccusha'je'fa.

Cca'tti cca'tti jacan'cho

10Tsa'caen tsomba israendeccuja jaye ashaemba Obotni japa can'jen'fa.

11Tsa Obotne sombopa a'i menia japa Ijeabarimni can'jen'fa. Tsa tsu Moab andene chiga sombo'jefa. 12Tse'ttie sombopa japa Zered naiquiccuni can'jen'fa. 13Tse'tti can'jencapa jaye ashaemba Arnón na'ema isepa tse'tti can'jen'fa. Nane Arnón tsu a'i menia'su na'en amorreo andenga ai'je'cho. Toya'caen tsu tsa Moab toya'caen amorreo andembe enttingeni. 14Tsane tsu Na'su Chiga Iyicco'je'cho tevaen'jenga qqen condase:

“Vaheb canquema gi panshan'fa tsa Sufá andeni.

Nane naiquiccu'ye japa gi Arnón naeni ja'fa.

15Toya'caen nai'qui otafa'ye gi ja'fa

tsa Ar andenga ai'je'cho nai'qui'ye.

Tsangae japa gi Moab andenga nepi'fa.”

¹⁶Arnón naine sombopa Beerni nepi'fa. Tse'tti tsu Na'su Chiga Moisésnga qqen su'tti'su poso: “Aindeccuma boñajan ña tsa'ccuma afeye” ¹⁷Tsa'caen afesi tsu israendeccuja qqen settapoen'fa:

“¡Tsa'ccu, poso'ye somboja!
¡Settapoen'faja posone!

¹⁸Nasundeccu tsu dyan'dya'fa
tise'pa coen quini'ccoi'ccu.
Nane a'ima manda'su coenzandeccu tsu
tise'pa accuicco'choi'ccu
va posove fetta'fa.”

A'i menia'ñe israendeccuja Matani nepi'fa. ¹⁹Tsa Matana'ñe Nahalielni nepi'fa. Tse'ttie Bamotni nepi'fa. ²⁰Tse'ttie japa moabitandeccu ande'su sinjuncuni nepi'fa Pisga ccotta'cco jin'ttinga. Nane tsa Pisga ccotta'cco'ye tsu pa'cco a'i menia'ma attian'jen'cho.

Ande na'su Sehónma patsu'cho

²¹Tse'tti can'jemba israendeccuja afasundeccuma moe'fa amorreo ande na'su Sehónnga cuintsu japa qqen su'faye: ²²“Que ande'ye panshañe gi in'jan'fa. Nane que'i nasipa jon'chonga ni que'i tsajaccunga ca'ni'faya'bi gi. Ni que'i poso'su tsa'ccuma cu'i'faya'bi. Tansintsse gi que'i andema Na'sumbe tsaiqui'ye panshan'faya.”

²³Tsa'ma Sehónjan israendeccuma tise ande'ye panshañe se'pi. Tsa'caen se'pipa poi'yi'cco tise aindeccuma ipa a'i menia ji israendeccuma cachuiye. Tsa'caen jipa Jahazani nepipa iyiccoye ashaen. ²⁴Tsa'ma israendeccu'qqe poini ashaemba tsendeccuma patsupa gana'fa. Tsa'caen ganamba Arnón naine toya'caen Jaboc naipi isupa tsa andeni can'jen'fa. Nane Jaboc nai'qui tsu amonitandeccu andenga cani'jen'cho. Tseni'su sundaroja ñotsse coira'je'fasi tsu tse'ttinga antte'fa. ²⁵Tsa'caen tsomba israendeccuja poi amorreondeccu canqueni can'jen'fa. Nane Hesbón toya'caen tsai'ccu pporotssi'su canqueni can'jen'fa. ²⁶Hesbón tsu amorreondeccumbe na'su Sehón canse'cho canqqe. Nane Sehón tsu tayo'su Moab ande na'sui'ccu geraemba pa'cco andema Arnón naipi itsa'cho. ²⁷Tsa'cansi tsu settapoensundeccuja su'fa:

“¡Hesbónga ji'faja!
¡Na'su Sehón canqqe tsu!
¡Ccase ñoñamba ñotsse ttu'faja!

²⁸Sehón canqqe Hesbóne tsu si'ngeja anchanda.
Anchandapa tsu Moab ande'su Ar canquema nepian,
tsa Arnón na'ema coira'je'cho canquema.

²⁹¡Va'cha qui Moab ande!
Ñoa'me qqe'cho qui Quemos chigambe canqqe.
Nane tise tsu antte
cuintsu tise tsandiendeccu ccuyapa ja'fasi

tise pushesundeccu na'su Sehónga indiyef'faye.

³⁰ ¡Hesbón tsu quin'su metsse da!

Dibóno toya'caen Nofapi metsse dañongesi
si'ngeja Medebapi nepi.”

Basán ande na'su Ogma patsu'cho

³¹Tsa'caen tsomba tsu israendeccuja amorreondeccu andeni canse'fa.

³²Tseni can'jemba Moisésja majan aindecuma moe cuintsu Jazer canquema a'tutsse can'ga'faye. Toya'caen israendeccuja tise'pai'ccu pporotsse jincho canquema patsupa tseni can'jen'cho amorreondeccuma tteya moe'fa. ³³Tteya moemba ombae Basán canqueni ja'jengae ja'fa. Tsa'ma Og, Basán canqque na'suja tise sundarondeccui'ccu sombopa Edreini israendecuma cachuipa iyiccoye ashaen. ³⁴Tsonsi Na'su Chiga Moisésnga su: “Dyombe can'faja, ña gi que'ima futeya cuintsu que'i tsendecuma patsuye. Nane ña futesi qui pa'cco tise sundarondeccu, tise andema, amorreondeccu na'su Sehón can'jen'cho Hesbón canquema tsonquia'caen tson'faya.”

³⁵Tsa'caen Na'su susi israendeccuja Og, tise dushundeccu toya'caen tise sundarondeccuma'qqe fittitti'fa. Ni fae'ccoyi'qqe antteyembitsse sefaemba tsa andema isu'fa.

Balacja Balaamma ttu'se

22 ¹Israendeccuja tsa'caen jacamba Moab ande'su sinjuncuni can'jen'fa. Tse'tti tsu Jordán na'ema chiga sombo'jefani, Jericó isevetsse.

²Tsa'caen can'jen'fasi Balac, Zipor dutssi'yeja israendeccu amorreondeccuma tson'choma in'jan. ³Toya'caen Moab aindecu ñoa'me dyo'fa israendeccu tsain'bitssi'fasi attepa. ⁴Tsa'caen dyopa Moab'su aindecu Madián'su coenzandecunga japa qqen su'fa: “Va aindecu pa'cco ingi andema tsu sefaen'faya vaura shoshovima an sefaenquia'caen.”

Tsaite tsu Balacja Moab ande na'su. ⁵Tsa'camba tsu manda cuintsu Beor dutssi'ye Balaamma ttusenga'faye. Nane Balaamjan Amav andeni, Petor canqueni can'jen Eufates na'en pporotsse. Balacja condasandecunga qqen Balaamnga su'faya'chove afapa moe: “Egiptone tsu tsain'bitssia aindecu jipa pa'cco andenga on'bapa ja'ñojan ñai'ccu pporotsse can'jen'fa. ⁶Jundeyi jipa ñane tsendecuma dañomba qqeñajan. Nane tsendeccu tsu ingima ti'tsse oshacho'fa. ¿Isha gi que tsa'caen tson'ninda ñajan tise'pama patsupa ña ande'ye tteya moeña'bi? Ñanda gi atesu que tsa'caen daya'cho qqen su'ninda ñoa'me tsa'caen da'choma. Nane ñotsse afa'ninda ñotsse tsu somboya; egae afa'ninda egae tsu somboya.”

⁷Tsa'caen susi moabita'su coenzandeccu toya'caen madianita'su coenzandeccu'qqe tise dañomba qqeñasi afepoña'cho corifin'dima isupa ja'fa. Tsa'caen japa Balaam can'jeni nepipa Balac su'choma condase'fa. ⁸Pañamba Balaamjan su:

—Ja'ño cose va'ttinga ana'faja. Ña gi Na'suma iñajampañamba tise su'choma que'inga condaya.

Tsa'caen susi moabita'su coenzandeccuja tisei'ccu can'jen'fa. ⁹Tsa'ma Chigaja tsequi cose Balaamnga attiamba qqen iñajampaña:

—¿Majandeccu tsu va quei'ccu can'jen'chondecuaja?

¹⁰Pañamba Balaamjan su:

—Moab ande'su na'su Balac, tsa Zipor dutssi'ye, tsu vandeccumae moe cuintsu ñani jipa qqen su'faye: ¹¹“Egiptone tsu tsain'bitssia aindecu jipa pa'cco andenga on'bapa ja'ñojan ñai'ccu pporotsse can'jen'fa. Jundeyi jipa ñane tsendeccumae qqeñajan. ¿Que tsa'caen tson'ninda ti gi ñajan tise'pama patsupa ña ande'ye tteya moeña'bi?”

¹²Tsa'caen pañamba Chigaja Balaamnga su:

—Tise'pai'ccu jajama ni tsa aindecumae qqeñajama. Tsendeccuta tsu ña in'jan'cho aindecu.

¹³Ccaqui a'ta sinte Balaamjan jangipa Balac moesi ji'cho coenzandeccumae qqen su:

—Ja'faja tisupa andeni. Na'su tsu se'pi ña quei'ccu jaye.

¹⁴Tsa'caen susi moabita'su coenzandeccuja toequi Balac can'jeni jipa qqen conda'fa:

—Balaamnda tsu ingi'ccu jiye in'jambi.

¹⁵Tsa'ma Balacja ccase faesu coenzandeccumae moe. Tsequita tsu o'tie ja'chondecumae ti'tsse'tssi a'ive moe ti'tsse joccapindeqquiama. ¹⁶Moesi japa Balaamma cachuipa su'fa:

—Balac, Zipor dutssi'ye tsu qqen suye ingima manda: “Chigáne, chi'gambe'yi jija. ¹⁷Jisi gi quema joccapitssia've tsoña. Toya'caen pa'cco que iñajan'choma gi tsoña. Tsa'ma jipa ñoa'metsse va aindecumae qqeñajan.”

¹⁸Tsa'ma Balaamjan su:

—Mapán Balac tise tsaoni cori, totoacorima'qqe on'ba'e an'biamba afe'ni'qqe ñajan Na'su ña Chiga mandambi'choa'ma mingae tsoñe'qqe oshambi. Nane ni injan'tsse ni re'riccoeyi'qqe tsoñe oshambi Na'su tsa'caen mandambiya'da. ¹⁹Tsa'ma ja'ño cose'qqe vani ana'faja. Tsonsi gi ñajan Na'su Chigama iñajampañamba atesuya tise mingae su'choma.

²⁰Tsequi cose Chigaja Balaamnga attiamba su:

—Ñoa'me va aindecu queve ji'fa'ninda jangipa tise'pai'ccu jaja. Tsa'ma jo'su ña su'choveyi tsu afaya'cho.

Balaam boroja afa

²¹Balaam ccaqui a'ta sinte jangipa tise boronga dyaipa'chove ñoñamba moabita'su coenzandeccu'ccu ja. ²²Tsa'caen Balaam tise boronga dyaipa jayisi dos tisema shondosundeccu'qqe ja'fa.

Tsa'ma Chigaja tise tsa'caen jasi iyicca'yepa manda Na'suma sefacconi'su shondo'su cuintsu Balaam panshansa'ne tsaiquima ttuye. ²³Tsa'caen mandasi

sefacconi'su shondo'su matichi'ccu tsaiqui enttingeni ccutsu'choma atepa boroja tse'ttima tsaiqui ccafae panshan. Tsa'ma tsa'caen anga jisi Balaamjan boroma ma'ppi cuiitsu ccase tsaiquini angaye. ²⁴Tse'ttie joqqitssipa Na'su Chigama sefacconi'su shondo'suja tsajaccumbe enttinge'ye ja'je'cho tsaiquini ccutsu. Tse'tti tsu poifama patui'ccu ttu'chopa re'riqui'cco. ²⁵Tsa'caen ccutsu'choma atepa boroja utufa'ye panshañe in'jamba Balaam ttena'goma asapian patu ttu'chonga. Tsonsi Balaamjan ccase boroma ma'ppi. ²⁶Tse'ttie joqqitssipa Na'su Chigama sefacconi'su shondo'suja tisema o'tie japa ñoa'me ta'yoquiccoanga ccutsu. Nane tse'tti tsu mafae panshaña'chove me'l'on. ²⁷Tsa'caen ccutsu'choma atepa boroja andenga ccui. Ccuisi Balaamjan iyicca'yepa quini'cco'ccu ochha'chha. ²⁸Tse'faei'ccuyi Na'su Chigaja boroma afaensi a'ia'caen afapa Balaamma qqen su:

—¿Jongoesuma gi tson? Vai'ccuta qui tres se tayo ñama ochhai.

²⁹Tsa'caen susi pañamba Balaamjan su:

—¿Jongoesie qui ñai'ccu co'fe? Chhichhi'ccoma an'bian'choecan'da gi va'ttingayi quema fi'ttiye'can.

³⁰Tsa'ma boroja su:

—Ñanda gi boro que chuitepie quema dyaiñamba angacan'su.

Toya'caen qui atesu minguite'qqe gi quema qqen tsincombi.

—Ñoa'me qui su —qqen Balaamjan su.

³¹Tsa'caen tson'jensi Na'su Chigaja tson cuiitsu Balaam tsa sefacconi'su shondo'suma atteye, enttinge tsaiquini matichi'ccu ccutsu'choma. Tsama atepa Balaamjan cambia'jui'ccu andenga puntssan ccui. ³²Tsa'ma Na'su Chigama sefacconi'su shondo'suja su:

—¿Jongoesie qui que boroma tres se ochha'chha? Ña gi ji tsaiquima ttuye que in'jamba jayi'cho ñane ñotssimbi'si. ³³Nane borota tsu ñama atepa tres se ccafanga ja. Ccafanga jambiecan'da gi tayo quema fi'ttipa boromajan canseveyi moeñe'can.

³⁴Tsa'caen susi pañamba Balaamjan Na'suma sefacconi'su shondo'suma su:

—Que tse'tti ccutsupa tsaiquima ttu'je'chove atesumbipa gi egae tson.

Tsa'caen ña jayi'cho egamajan shandaya gi.

³⁵Tsa'ma Na'su Chigama sefacconi'su shondo'suja su:

—Jaye qui osha. Tsa'ma japa ña suqquia'caeni suja.

Balaam Balacma cachui'cho

Tsa'caen susi Balaamjan Balac moe'cho coenzandecui'ccu ja. ³⁶Balacja Balaam jiña'choma pañamba Ar na'en jin'tti'su Moab canqqeni cachuiye ja. (Tse'tti tsu Moab ande sefa'tti.) ³⁷Tseni cachuipa su:

—Junde jiye mandasi ¿micomba qui jiye chi'ga? ¿Ñajan ñoa'metsse tsa'caen quema joccapitssia've tsoñe oshambi qqen ti qui in'jan?

³⁸Tsonsi Balaamjan su:

—Nane tayo gi quema can'su jipa can'jen. Tsa'ma oshambi gi tisisse in'jan'choma afaye. Ñanda gi jo'su Chiga su'choveyi afaye osha.

³⁹Omboe Balaamjan Balacui'ccu Quiriot-huzotni ja'fa. ⁴⁰Tseni tsu Balacja manda cuintsu vaura, ovejama'qqe fi'ttipa Balaamni anga'faye; toya'caen coenzandeccuja cuintsu tise ma fuite'faye. ⁴¹Ccaqui a'ta sinte Balacja Balaamme tta'ttapa attepa Bamot-baal cotta'ccongá ansundian. Nane tsene tsu israendeccu can'jen'fa'choma cañe a'tatssi.

23 ¹Tsa'caen ansundepa Balaamjan su:
—Va'ttinga siete oque oraen'jen'chove ñoña'faja ñambe. Toya'caen siete vaura du'shu quitsaye, siete oveja quitsayema'qqe fi'ttipa ñoña'faja.

²Tsa'caen susi Balacja Balaam suqquia'caen tson. Tsa'caen tsomba tsa dos fae'ngae oque'fa. Nane poi tsu fae vaura du'shu, fae oveja poi oque'je'chonga ottaemba oque'fa.

³Tsa'caen tson nanimba Balaamjan Balacnga su:

—Queja va'tti va oque'je'choi'ccu can'jenjan, ña japa atesuye Na'su Chiga te ñama cachuiye ji've'se. Tsene jipa gi quenga condaya tise ñanga attiamba su'choma.

Israendecuma ñotsse afa'cho

Tsomba tse'i Balaamjan a'i menia'su cotta'ccongá jasi ⁴Chigaja tisenga attian. Attepa Balaamjan Chiganga su:

—Siete oque'je'chove gi ñoña. Poiyi'ccongá gi vaura du'shu, toya'caen ovejama'qqe oque.

⁵Tsa'caen susi Na'su Chigaja Balaam ma'caen afaya'chove afaemba su:

—Toequi Balac can'jeni japa ña quenga suqquia'caeni suja.

⁶Tsa'caen susi toequi jipa Balaamjan Balac oque'je'tti jin'tti cutsu'choma atte, toya'caen poiyo'cco moabita'su coenzandecuma'qqe.

⁷Tsa'caen attepa Balaamjan va su'choma conda:

“Chiga sombo'jeni'su cotta'cco Aramne gi ji moabita'su na'su Balac ttu'sesi.

‘Jipa israendecuma qqueñañe afaja.

Jacob aindecuma egae in'janjan' qquen tsu su.

⁸Tsa'ma ¿ma'caen gi qqueñaña Na'su Chiga qqueñambian'da?

Toya'caen ¿ma'caen gi egae in'jaña

Na'su Chiga tsa'caen tsombian'da?

⁹Va se'fatssia cotta'cco'su patuvo'cho'ye gi atteye osha.

Vambe tansin'chone gi can.

Tsa aindecuta tsu cca'tti can'jen'fa.

Faesu a'iacan'fambi tsu.

Sisipa'caen tsu tsendeccuja tsain'bitssi'fa.

¹⁰¿Majan tsu tsama agattoyeja oshaya?

¿Majan tsu tise'pa mi'nge'tssia've atesuya?

¡Ma'caen'qqe te gi tsa ño'an aindecui'ccu

fae'ngae paye'can!

Nane tise'pa papa ma'caen da'je'nijan
ñ'a'qqe tsa'caen daye'can.”

¹¹Tsa'caen su'jesi Balacja Balaamma su:

—¿Mincón qqen qui tson'jen? Ñanda gi quema i va ñai'ccu
iyicosundeccuma qqeñañe. Tsa'ma queja tise'pane ñotsse afa'je.

¹²Tsonsi Balaamjan su:

—Tayo gi conda, ñajan jo'su Na'su Chiga su'choveyi gi suya qqen.

¹³Tsa'ma Balacja ccase afapa su:

—Ñai'ccu jija cca'ttinga. Tse'ttieta qui pa'ccoma attembipa jo'su
canqqe utufaveyi atteya. Tseni japa tise'pane egae afaja.

¹⁴Tsa'caen supa Balacja Balaamma anga Zofim nasipa tsa Pisga
ccotta'cco tansin'choni. Tseni siete oque oraen'jen'chove ñoñamba poinga
fae vaura du'shu toya'caen fae ovejama ottaemba oque'fa. ¹⁵Tse'ttinga tsu
Balaammajan Balacma su:

—Queja va'tti va oque'je'choi'ccu can'jenjan ña japa Chigama cachui'ngaye.

¹⁶Tsa'caen jasi Na'su Chiga Balaamma cachuipa ma'caen afaya'chove
afafaemba toya'caen qqen su:

—Balac can'jen'ni japa ña quenga suqquia'caeñi afaja.

¹⁷Tsa'caen susi toequi jipa Balaamjan Balac oque'je'tti jin'tti
ccutsu'choma atte, toya'caen poiyl'cco moabita'su coenzandeccum'aqqe.
Jisi Balacja ñajampaña:

—¿Mingae tsu Na'suja su?

¹⁸Tsa'caen susi Balaamjan qqen su:

“Zipor dutssi'ye Balac, ñotsse in'jamba
ña su'choma pañajan.

¹⁹Chigaja ingi a'ia'cambipa afopoembi ni cambiaña'bi.

Nane tise ma'caen su'ta tsu tsa'caen tsoña.

Tise ñoa'me tsoña qqen su'ta tsu tsa'caen tson.

²⁰Tise ñotsse afaja qqen mandasi gi
ñotsse afa'je.

Chiga ñotsse afa'choma ñajan egae afaye oshambi.

²¹Nane atte'fambi tsu

Israendeccu, tsa Jacob aindeccu,
afopoen'cho ni egae tson'choma.

Tise'pa Na'su Chiga tise'pai'ccu can'jensi
tsu tise'paja tisema Na'suve an'bian'fa.

²²Chiga tise'pama Egipto'ye somboen'su tsu tise'pambe.

Tsa'cansi tsu tsampi'su vaura tise can'choi'ccu
dyoñaqquia'caen dyojo'fambi.

²³Jacobma dañoñe moe'cho'qqe barembi.

Toya'caen israendeccuneja coraga'qqe barembi.

Ja'ñonda tsu ñoccatse israendecune qqen afaya'cho:

‘¡Mi'ngae'qqe tsu Chigaja que'i'ccu ñoccatse tson!’

24 Nane ttesi jangipa añ'a'choma omboemba

japa indipa tte'pputsse amba

tsa'su anjampama cu'ipa ccuiquua'can tsu.”

25 Tsa'caen Balaam susi Balacja su:

—¡Ya'caen tsendecune egae afaye oshambi'ta tise'pane ñotsse afajama!

26 Tsa'caen susi Balaamjan su:

—¿Minga'in ñajan jo'su 'Na'su Chiga mandaquua'caeni afaya' qqenjan su?

27 Tsonsi Balacja su:

—Jija cca'ttinga gi quema angaya. ¿Tseni ja'ninda ti Chigaja antteya'bi que israendecune egae afaya'chove?

28 Tsa'caen supa Balacja Balaamma angapa ansundian Peor ccotta'cco tansin'choni. Tse'ttieja jo'su a'i menia'meni atteye osha. 29 Tseni nepipa Balaamjan Balacma su:

—Va'ttinga siete oque oraen'jen'chove ñoña'faja ñambe. Toya'caen siete vaura du'shu quitsaye siete oveja quitsayema'qqe fi'ttipa ñoña'faja.

30 Tsa'caen susi Balacja Balaam suquua'caen tsomba fae vaura du'shu fae oveja poi oque'je'chonga ottaemba oque'fa.

24 1 Tsa'ma Balaamjan Na'su Chiga Israelma ñotsse tsoñe in'jan'choma in'jamba tise tayoe a'tutsse japa afa'jequua'caen tsombe tansintsse a'i menia'ma can. 2 Tsa'caen cambia Balaamjan doce israe'su aindecuve attufaen'choma attesi Chiga Qquendya'pa tisenga ca'nisi 3 qqen jai'ngae tsoña'chove afa:

“Vata tsu Beor dutssi'ye Balaam

jai'ngae tsoña'chone afa'cho.

Nane tso'fei'ccu tansintsse cambia afa'cho tsu.

4 Ñoa'me Chiga su'choma pañamba afa'cho tsu.

Nane tiseja andenga ccuiye amppisi

Osha'choma Oshacho'cho Chiga tisenga canjaemba

tise tso'fema fettasi tsu atte.

5 Jacob aindecu, ñoa'me ñotssi tsu

que'i carpa tsa'o sheque'cho.

Israendeccu, ñoa'me ñotssi tsu que'i can'jen'tti.

6 Nane naifani sheque'cho ñotssia nasipa'caen

que'ija teta'je'fa,

Na'su Chiga jon'cho seje'pa'can'fa qui.

Toya'caen naifani shaga'tto ccutsuquua'can'fa qui.

7 Israendecuja tsa'ccuma shacambitsse

an'bian'faya tisupa cu'iye,

toya'caen jomba'chonga fiñaña'chove'qqe.

Tise'pa na'su'qqe Agagma patsusi

Tise'pa manda'choja ti'tsse'tssiya.

8 Chiga tise'pama Egiptone somboen'su tsu tise'pambe.

Tsa'cansi tsu tsampi'su vaura tise can'choi'ccu
dyoñaquua'caen dyojo'fambi.

Nane Israelja tsu'ttama an shequianquua'caen patsuya.

Tise'pai'ccu iyicco'suma battittianccui'ccu battian fi'ttiya.

9 Ñofaye ccui'ta tsu ttesia'caen attiaña.

Tsa'cansi majañi'qqe tise ma jangiañe oshambi.

¡Majan quema ñotsse afa'ta cuintsu ñotsse daye!

¡Majan quema dañe egae afa'ta cuintsu egae daye!"

Jai'ngae tsoña'chone afa'cho

10 Balaam tsa'caen afasi ande na'su Balacja ñoa'me tise ma iyicca'ye.
Iyicca'yepa tise tivema faesu tivei'ccu tssaijeñamba su:

—¡Ñajan quema ttu'se ñama iyiccayesundeccuma egae afaye! Tsa'ma queja
tres se tise'pane ñotsse afa. 11 ¡Bove ñotssi tsu que tsaoni junde jaye! ¡Ñajan
ñotssiam quenga afeye qqen susi tsu que 'Na'suja' se'pi ña tsa'caen afeye!

12 Tsa'caen susi Balaamjan Balacnga su:

—Tayo gi quenga condasesundeccunga, qqen conda: 13 'Mapán cori,
totoacori que tsaoni jincho'choma afe'ni'qqe ñajan Na'su Chiga su'choma
pasapa ni ñotsse ni egae tsoñe oshambi gi. Taya'caen tisu in'jan'choma afaye
oshambipa Na'su su'choveyi gi afaye osha.' 14 Ju, ja'ño gi jaya ña andeni.

Tsa'ma toyi'te gi va aindeccu que'ima jai'ngae tsoña'choma qqen condaseya:

15 Tsa'caen supa Balaamjan qqen su:

“Vata tsu Beor dutssi'ye Balaam
jai'ngae tsoña'chone afa'cho.

Nane tso'fei'ccu tansintsse cambia afa'cho tsu.

Ñoa'me Chiga su'choma pañamba afa'cho tsu.

16 Na'su Chiga Balaamma in'jaensi tsu in'jamba afa'je.

Nane andenga ccuiye amppisi

Osha'choma Oshacho'cho Chiga tisinga canjaemba
tise tso'fema fettasi tsu atte.

17 Jai'ngae'su osha'choma gi atte.

Ñoa'me jai'ngae'suma gi bianima atte.

Fae o'fe tsu Jacob aindeccu'ye somboya.

Fae Na'su tsu israendeccu'ye somboya.

Tsaja cambia'juma doñaquua'caen Moab aindeccuma patsuya.

Nane pa'cco Set dutssiyendeccumbe tsove tsu'ttama tsu doñaña.

18 Edom ande, tsa Seir'su,

tise ma iyiccayesundeccuma'qqe tsu patsuya.

Tsa'ma Israelmjan quinetssive tsu tsoña.

19 Nane Jacob aindeccu'ye tsu Na'su Patsu'suja sombopa

- canqqueni toya canjensundecuma sefaeña.”
- 20 Tsomba Balaamjan Amalec aindecuma attepa qqen su:
 “Amalecja poi aindecuma ti'tsse'tssia tsu.
 Tsa'ma osefa'poe tsu me'tsse daya.”
- 21 Tsomba Balaamjan Quenitas aindecuma attepa qqen su:
 “Caín omba'su dutssiyendeccu qui.
 Dyombe'yi qui can'jen'fa,
 chhiriria patunga tsao'paenquiacen.
- 22 Tsa'ma Asiriandeccu que'ima indi ji sefaeña.”
- 23 Tsomba Balaamjan ccase jai'ngae tsoña'chove qqen afa:
 “¡Ay! Chiga tsa'caen tsonsi ¿majan tsu ccushaya?
- 24 Nane Chipre andeni sheque'cho barco tsu cattufapa
 Asiria toya'caen Heberma patsuya.
 ¡Tsa'ma tsa'caen patsupa tsu jai'ngae patsuyeya!”
- 25 Tsa'caen supa Balaamjan jangipa ja tisu andeni. Toya'caen Balac'qqe tisu tsaoni ja.

Baal-peorma ñajan'cho

- 25** ¹Israendeccuja Sitimni can'jemba majan tsandierendeccuja Moab'su pushesundeccu'ccu egae tsincoñe ashaen'fa. ²Nane tsendeccu tsu ttu'se'fa cuintsu israendeccu'qqe tise'pa chiganga afe'jeni ja'je'faye. Ttu'sesi japa israendeccu'qqe tise'pa chiganga afe'cho'su ña'choma amba Moab'su chigama ñajan'fa. ³Tsa'caen tsomba tsu poi'yi'cco israendeccu Baal-peor chigama ñajañe ashaen'fa. Tsa'caen tson'jen'fasi Na'su Chigaja israendecuma ñoa'me iyicca'yepa ⁴Moisésnga qqen su:
 —Poi'yi'cco va aindecu nasundecuma boñamba fi'ttipa ñoa'me a'tatsse canjaen'faja ña caña'jen'ni. Attepa gi ña tise'pama iyicca'ye'choma ñoquiya.
- ⁵Tsama pañamba Moisésja israe'su ñoquiandsundecuma qqen manda:
 —Poi'yi'cco que'i tisu aindecu majan Baal-peor chigama ñajansundecuma fi'tti'faja.
- ⁸Tsa'caen tsonsi tsu israendecuma fi'tti'je'cho paqqe'suja pasa.
- ⁹Tsa'ma tayo tsu veinte y cuatro mil israendeccu'su pa'fa.
¹⁶Toya'caen Na'su Chigaja Moisésnga qqen su:
¹⁷—¡Madianitandecuma geraemba sefaen'faja! ¹⁸Nane tise'pa que'ima chi'gapa Baal-peor chigai'ccu que'ima qqeñaqquia'caen tsu tise'pama'qqe qqeñamba sefaeña'cho.

Madiánma sefaen'cho

- 31** ¹Na'su Chigaja Moisésma ttu'sepa su:
²“Madiandeccu israendecuma qqeña'chone tsu ccane'qqe tise'pama sefaeña'cho. Tsa'caen tson nanimba qui paya.”
- ³Chiga tsa'caen susi Moisésja aindecunga su:

—Majan que'i'sundeccu geraeña'chove ñoñamba madiandecui'ccu iyicco'faja que'ima qqueña'chone toya'caen Na'su Chiga inisema qqueña'chone. ⁴Nane poi doce aindecu'suma tsu mil tsandieveyi geranga moeña'cho.

⁵Tsa'caen susi pañamba poi aindecu'su mil sundarove dapa doce mil sundarove pa'ccoja sombo geraeña. ⁶Moisésja Fineesma, tsa Chigama afa'su na'su Eleazar dutssi'yema, sundarondeccu na'suve tson. Geranga jayipa Fineesja osha'cho Chigambe jincho'cho, toya'caen tsonjen'cho randema anga tsai'ccu iyiccoya'chove fendoye. ⁷Tsa'caen japa madiandecui'ccu iyiccopa pa'ccoma sefaen'fa Na'su Chiga Moisésnga mandaquia'caen. ⁸Nane cinco madián'su nasundeccuma fi'tti'fa, tsa Evi, Requiem, Zur, Hur toya'caen Reba. Toya'caen tsu Balaam, tsa Beor dutssi'yema'qqe fi'tti'fa.

¹⁵Tsa'ma Moisésja israendecuma iyicca'yepa su:

—¿Jongoesie qui pushesundeccuma canseye antte'fa? ¹⁶Tsendeccu Balaam su'choma pañamba tson'fa israendecuma qqueñaña. Nane qqueñasi israe'su tsandiendeccu Na'suma catipa Baal-peorma iñajamba tsa pushesundeccui'ccu egae tsincon'fa. Tsa'caen tson'fasi Na'suja paqqe'sui'ccu israendecuma vanae. ¹⁷Tsa'cansi va pushesundeccuma'qqe poi'ccu majan tsandiendecui'ccu can'jen'fa'choma fitti'ttiya'cho, poi tsandie du'shuma'qqe.